



## PCN ta invertí grandiosamente den energia solar

Den e solo kayente di sèptèmber ta difísil pa no duna e kalentamentu di mundu falta di e molèster di tantu kalor. Pero si bo sa ku Van den Tweel, un di e supermerkadonan mas grandi na Boneiru, tin awor mas ku 710 panel solar riba su dak, e lo produsí un sonrisa riba bo kara. E instalashon fotovoltaiko ('PV') nobo nobo ta usa e lus di solo briyante pa generá suficiente elektrisidat pa su uso durante di dia.

E sistema aki tin un kapasidat di 284.000 watt i lo no pèrkurá solamente pa un uso di energia mas eficiente di Van den Tweel, pero e lo yuda tambe pa redusí e 'carbon footprint' na Boneiru drástikamente, segun Bharat Bhojwani di Participatiemaatschappij Caribisch Nederland B.V. ('PMCN'). PMCN ta e vehíkulo pa invertí kapital di Pensioenfonds Caribisch Nederland 'PCN' pa tur su invershonnán lokal riba e islanan BES

E transakshon di PMCN a bira posibel den forma di un kombenio *solar lease* ku e grupo di Van den Tweel. E invershon aki ta pas perfektamente den e metanan Ambiental, Sosial i Bon Governashon (Environmental, Social and Governance "ESG") di tantu PMCN komo esnan di Van den Tweel Caribbean. PMCN ta konta ku esaki ta e promé di mas instalashon-PV ku e ta hasi posibel riba islanan BES. Na Van den Tweel a demostrá ku por i ku e ta funshoná!

E distribuidó di instalashon-PV, IFA Solar Energy, ku ta establese na Kòrsou, tabata un konekshon krusial den e totalidat. Señor Henoc Luis di IFA Solar Energy no ta un desconosí den e sektor empresarial Boneriano i a instalá sistemanan semehante kaba pa mas empresa na Boneiru. "Pa e proyekto nos por a usa e mihó panelnan solar i konvertidó ku tin riba merkado. Elektrisistanan lokal di Boneiru a yuda nos profeshonalmente pa prepará e supermerkadu pa e energia di e panelnan", Luis ta bisa.



## **Kontentu**

Direktor Ike Johnson i Chief Operating Officer Omar Barrientos di Van den Tweel Caribbean Group ta hopi kontentu ku e invershon aki. “Na komienso di nos kòmbersashonnan pa posishoná e instalashon-PV, e preis na Boneiru tabata masoméno USD 0,23 pa kwh. Awor aki e ta mas ku USD 0,40 pa kwh, komo konsekuensia di e redukshon di supsidio for di Hulanda i e preisnan haltu pa kombustibel”. E invershon aki ta bini pues na e momentu perfekto pa e supermerkado grandi aki na Boneiru.

E siguiente ku ta na turno pa Van den Tweel Caribbean na Boneiru ta Bonaire Warehouse. Segun espektativanan lo kuminsá ku instalashon na e sitio den luna di òktober.